

पंचपरगनिया सर्वनाम की सामान्य जानकारी पंचपरगनिया सरब'नाम केर चिन्हाप

सरब'नाम केर अरथ'

सरब'नाम केर साब्दिक अरथ' हेके - सरब' (सउब) नाम (संइगा) इआनि सरब' (सउब) नाम (संइगा) केर बदले जे सब्दक बेब'हार करल जाएला उके सरब'नाम कहल जाएला । इआनि संइगाक जाएगाँ अकर अउजि रूप मेंहेन जन सब्दक बेब'हार करल जाएला उटाके सरब'नाम कहल जाएला ।

सरब'नाम केर बेब'हार

संइगा अहे चिज - बस्तु टाकरे ब'ध कराएला जेटा अकर नाम हेके, किंतु सरब'नाम मेंहेन पहिलुक संबंध अनुजाइ कन'इ भि बस्तु केर ब'ध कराएला, बेटा छुआ कहले सिरिफ बेटाछुआ केरे ब'ध कराएला कन' पसु - पखि केर निहिं । किंतु “उ” कहले पहिलुक संबंध अनुजाइ कन'इ भि बस्तु केर ब'ध हए पारेला ।

सरब'नाम केर गुन

बाइक मेंहेन सरब'नाम केर बेब'हार ना हए, ता हले एके सब्द' केर ढेइर धं आबिरति, पास - धुर ब'ध केर अभाव, आदर - अनादर ब'ध केर अभाव, निसूचए - अनिसूचए ब'ध केर अभाव एमाइन जाला ह'इ । आर एसन टाँए बाइक मेंहेन सुंदरता टा नसूट' ह'ए जाइ । इ रकम सरब'नाम कन' सब्द' के साराधं कहेक द'स ले बांचाएला । इ भाभे कहल जाए पाराए कि सरब'नाम केर बेब'हार करले भासा इसूपसूट', परबाह आर अलंकिरित हए जाएला ।

सरब'नाम केर भेद

पंचपरगनिया सरब'नाम केर छ' टा भेद आहे -

9. **पुरुस बाचक सरब'नाम** - जन सरब'नाम ले पुरुस एआनि गलफ' एआ लिखेक सम'इए कह'इआ, सुन'इआ चाहे जेकर बारे कहल जाएला, इटाक गेआन हएला, अके पुरुस बाचक सरब'नाम कहल जाएला । एकर तिन टा भेद आहे -

	एक बचन	बहु बचन
क. उत्तम पुरुस	माँ	हामरे/हामरे सउब
ख. मइधम पुरुस	ताँ	तहरे/तहरे सउब
ग. अइन' पुरुस	इ	इमन/इमने/इमरे
	उ	उमन/उमने/उमरे
	रउरे (आ.सु.)	रउर मन/रउर सउब (आ.सु.)

उत्तम पुरुस आर मइधम पुरुस के छ'इड़कहन सरब'नाम केर आर' ज'तराइ भेद आहे, उगला सउब अइन' पुरुस सरब'नाम केर हेके । उत्तम आर मइधम पुरुसे किलल पुरुस केर बदलि आएला बाकि सरब'नाम गिला पुरुस केर आलाउआ अइन' जाइत, जिब - जंतु केर तेहंउ बेब'हार करल जाएला, अहे तेहें उत्तम पुरुस आर मइधम पुरुस केइ पुरुस बाचक सरब'नाम कहल जाएला । ऐसे त' सभे सरब'नाम पुरुस बाचक कहल जाएला, काहेकि इगला ले बेआकरन केर पुरुस केर ब'ध हएला । किंतु दसरा सरब'नाम ले उत्तम आर मइधम पुरुस केर ब'ध नि हएला, अहे तेहें उत्तम आर मइधम पुरुसे परधान पुरुसबाचक सरब'नाम हेके बाकि सरब'नाम गिला अपरधान पुरुस बाचक हेके ।

२. निसच'ए बाचक सरब'नाम - जन सरब'नाम ले कन' निसचित ल'ग चाहे चिज बसूतु केर गेआन हएला उगला के निसच'एबाचक सरब'नाम कहल जाएला । पंचपरगनिया मेंहेन एकर तिन असूतर आहे - पासेक तेहें - इ, तनिक धुरेक तेहें - उ, एकर ले बेसि धुरेक तेहें - हाउ । जेसन -

एक बचन	बहु बचन
पासेक तेहें इ लग टा राधा केर बाप हेके ।	इमन राधा केर माँ - बाप हेकाँ ।
इ छागेइर टा बाधना केर हेके ।	इ छागेइर गिला बांधना केर हेकेन ।
धुर केर तेहें उ लगटा राधा केर बाप हेके ।	उ लग गिला राधा केर माँ-बाप हेकेन ।
उ छागेइरटा बुधनि केर हेके ।	उ छागेइर गिला बुधनि केर हेकेन ।
बेसि धुरेक तेहें हाउ लगटा राधा केर बाप हेके ।	हाउ लग गिला महतो घरेक कामिआ हेकेन ।
हाउटा राधा केर छागेइर हेके ।	हाउ गिला राधा केर छागेइर हेकेन ।

हिंआ निसच'ए टाके बल देएक तेहें "टा" सब्द' ज'ड़ल जाएला ।

३. अनिसूचए बाचक सरब'नाम - जन सरब'नाम ले कन' निसूचित लग चाहे चिज बसूतु केर ब'ध नि हएला उटाके अनिसूचए बाचक सरब'नाम कहल जाएला । पंचपरगनिया मेंहेन केउ, कन', के, केकर', केकउ एमाइन अनिसूचए बाचक सरब'नाम हेके । जेसन -

केउ दकान जाउन ।

दकाने कन' नेखे ।

कन' लग उठिन ठाड़ आहे ।

कन' छुआ बांधे डुबलक ।

के उठिनटा ठाड़ आहे ।

केकर' डट उठिन गिर आहे ।

मामा घर केकउ हले जाए ह'इ । एमाइन

४. परसून'बाचक सरब'नाम - परसून' करेक तेहें जन सरब'नाम केर बेब'हार करल जाएला, उगला के परसून'बाचक सरब'नाम कहल जाएला । पंचपरगनिया मेंहेन परसन' बाचक सरब'नाम के, केकर, का, कन, केसन, एमाइन हेके ।

- सामाइन' रूपे पंचपरगनिया मेंहेन मानुस केर तेहें के, केकर, के - के, आर छटे - छटे जीउ आर चिज बसूतुक तेहें का केर बेब'हार करल जाएला । जेसन -

मानुस केर तेहें - के खालक ? के नाहातेहे ? केकर भेड़ा हेके ? के - के लिखला ? केकर ठिन जाए रहिस ? एमाइन ।

छटे - छटे जीउ , चिज बसूतुक तेहें चाहे कन' काथा पुछेक तेहें -

इटा का जीउ हेके ? का खाबे ? इटा का हेके ? का जिनिस राखल आहे ? का कहले ? का गिला कहिसूला ? एमाइन ।

- “केसन” सब्दक बेब'हार कन' लग, जीउ - जंतु, चिज - बसूतु एमाइन केर भाउ, बिसेसता केर बारे परसून' पुछेक तेहें करल जाएला, जेसन -

उ केसन धाराक लग हेके ?

बकलिटा केसन रंगेक आहे ?

तिअनटा केसन लाग' तेहे ?

उ बेटिछुआटाक चाइल - चलन केसन आहे ?

इ आम गिलाक सउआद केसन आहे ?

- “कन” केर बेब’हार मानुस, छटे - छटे जीउ आर चिज बसूतु तिन’ केर तेहें करल जाएला ।

जेसन -

कन लग हेके ? तहरे कन गांड केर हेका ?

कन गाइटा दुधारू हेके ? कन गाछटा गिरलक ?

कन लगटा लेइहा हेके ?

कन कंठर टा पाकलक ?

५. निज बाचक सरब’नाम - जे सरब’नाम निजेक चाहे आपने आप टाकेर ब’ध क’राएला उके निज बाचक सरब’नाम कहल जाएला । पंचपरगनिया निजबाचक सरब’नाम आपने, खुद, निजेइ, आपन हेके । जेसन -

आपने - माँ आपने लिखलँ ।

खुद - माँ खुद जाए रहँ ।

निजेइ - कन’ काम निजेइ करले बेस ।

आपन - आपन सामान ज’गाए के राखले बेस ।

६. संबंध बाचक सरब’नाम - जन सरब’नाम ले कन’ संइगा केर संबंध जाहिर हएला, उटाके संबंध बाचक सरब’नाम कहल जाएला । पंचपरगनिया केर संबंध बाचक सरब’नाम जे - से/उ/ते, जेटा - सेटा, जे गिला - से गिला, जन टा - तन टा एमाइन । जेसन -

जे खाटि से/उ/ते चाटि ।

जे पढ़ि से/उ/ते पास करी ।

जे आइ से/उ/ते पाइ ।

जे चाँड़े आइ से/उ/ते पाइ ।

जे आम गिला पाकलक से गिलाके पाड़ा ।

जन टा गिरलक तन टाके फेंका ।

जेटा पचलक सेटा के फेंका ।

बिसेस काथा -

पंचपरगनिया मेंहेन “रउरे” केर बेब’हार आदर देएक तेहें करल जाएला, किंतु एके आलेदा रूपे आदर सुचक सरब’नाम नि मानल जाएला । इटाके पुरूस बाचक सरब’नाम केर भितरेइ राखल जाएला ।

Onlineppg.com